

RAMPHIS TROMP LO BAY PURBA SU SUERTE NA CORSOW DEN FESTIVAL DI TUMBA..

Foto/texto: Jan Poets.

DEN AMBIENTE

** E aña aki un biaha mas miembronan di asosacion di musico y artista di Corsow a bin Aruba pa tene un rueda di prensa, relaciona cu nan grandioso festival di Tumba. Durante e rueda di prensa teni den Cheers Cafe Bistro, presidente di Asosacion di Musico di Corsow, Sr. Feco Gomez a relata tocante e festival su desaroyonan, na unda e aña aki lo bay tin porlomenos 90 participante y cu e huradonan lo ta den un camber special pa studia tur e tumbanan den un forma mas sofisticada. E dia di inscripcion mes lo bay tuma lugar dia 25 di januari proximo.

E sorpresa durante e rueda di prensa aki tabata, na unda Feco Gomez a anuncia e participacion di Ramphis Tromp na Corsow pa e titulo di Rey di Tumba. Den e mesun rosea Feco Gomez ta participa tambe cu esaki kiermeen cu den

futuro participantenan di Corsow tambe por participa den e festival di Tumba di Aruba.

Na momento cu DEN AMBIENTE a haya oportunidad pa haci pregunta, DEN AMBIENTE a refresca memoria di e miembronan di Corsow, cu un hurado mes a yega di bisa publicamente cu hama un extranhero por bira Rey di Tumba na Corsow, riba cual Sr. Feco Gomez a contesta cu esey tabata expresionnan di e hurado kende actualmente ta gezaghebber interino di Corsow Sr. Angel Salsabach y cu su persona no ta di acuerdo cu ne. E pregunta aki no a ser haci den un sentido negativo, pero simplemente pa haya e otro banda di medaya y cu ki garantia e participacion di Ramphis Tromp lo bay ta na Corsow.

Mester bisa cu e encuentro aki a bay den un bon ambiente



** Aki por aprecia Ramphis Tromp den compania di miembronan di Asosacion di Musico y Artista Curacao y tambe su compositor Betty Doran kende ta tata di Gibi Doran..

y por a nota un Ramphis Tromp sumamente entusiasmo pa e reto hopi dificil aki, pero tog importante pa participa loke ta conta mas.


Mirando e maestronan cu lo bay traha cu Ramphis Tromp su tumba, kendenan ta Gregory

Colina como areglista y Betty Doran como compositor y respalda pa e banda musical Locomotion, no ta exlui e posibilidad conociendo e curashi grandi di Ramphis, cu e por hasta slip y pasa entre e finalistanan pa e anochi final, cual

sigur lo bay pone henter Aruba tembla.

DEN AMBIENTE ta desea Ramphis Tromp hopi EXITO na Corsow y sperando cu e lo sa di representa nos pais tur bon cu tin..

TROMBONISTA DI O.R.E.O. BIBI GIBS Y MILUSKA MADURO A SER BENDICIONA CU UN PRINSENCITA..




** Diadomingo ultimo dia 11 di Januari 1998, e feliz pareha farandulero Bibi Gibbs popular trombonista di Claudius & O.R.E.O. y Miluska Maduro participante durante e certamen di Miss Universe Aruba 1995, a ser bendiciona cu un precioso prinsencita. E futuro Miss Trombonista Modelo a nace 8:59 AM y a ser bendiciona bao di e nomber Arnalda Arluska Kathysca Gibbs. DEN AMBIENTE ta felicita e feliz pareha farandulero cu nan bunita prinsencita y cu bon DIOS drama su Bendicion riba Arnalda, Arluska, Kathysca Gibbs..

ROBERT Y SU SOLO BANDA SHOW TA LOS NAN TEMA PA CARNAVAL 44... "SLAM IT"..

** Ya caba por a scucha y goza e tema carnavalesco di Robert y su Solo Banda Show titula "Slam It", cual ta un roadjam aregla pa e propio integrantenan di Solo Banda Show y compone pa Larry Hoo y Kevin James. E grabacion a tuma lugar den Aruba Recording Studio.

Pa prome biaha como cantante ta participa e trombonista Larry Hoo, kende porfin a realiza su soño, asina e mes a expresa na DEN AMBIENTE net despues cu el a termina cu su parti di grabacion. E grabacion aki a ser dirigi pa Kevin James y e trabao di ingeniero di studio/mescla tabata na encargo di Don Antonio Lacle.

Por a compronde for di Robert Jeand'or cu durante e parada di carnaval un biaha mas nan lo ta hunto cu Hospi Jollys. Un bon noticia tambe cu DEN AMBIENTE a ricibi for di Robert Jeand'or, cu despues di e temporada di Carnaval, su CD lo ta riba mercado, cual sigur lo ta uno cu lo bay dal masha duro mes durante aña 1998..



** Larry Hoo trombenista di Robert y su Solo Banda Show grabando su voz como cantante pa e roadjam aki..

